

Inatsisartut suleriaasianni § 37 naapertorlugu matumuuna Naalakkersuisunut imaattunik apeqquteqaatinik saqqummiussivunga:

- 1) Sinersortaatip Sarfaq Ittuup Nanortalimmut tikittalersinnaananeranut Naalakkersuisut piviusunnngortitsinissaminnut piumassuseqarpat?**
- 2) Ukiuni kingullerni pingasuni sinersortaatip ilaasoqarnikkut illoqarfikkaartumik qanoq kisitsisitigut takussutissaqarnera Naalakkersuisut nalunaarutigisinnaavaat?**
- 3) Nanortallip sinersortaamik tikinneqartalernissaa siunniunneqassappat suummita unammilligassat annertunerpaajuppat?**
- 4) Naalakkersuisooqatigiinnissamik isumaqatigiisummi ilaatigut imatut allassima-soqarpoq: "Pisariaqartitsineq naapertorlugu umiarsuakkut ilaasunik angallassineq ingerlaannassaaq". Oqaaseq pisariaqartitsineq qanormita paasineqassava? Imatut paasineqassanerluni illoqarfiit nunaqarfiilluunniit tikinneqartarnissamik pisariaqartitsinerusut tikinneqartarnissaat salliutinneqassasut?**
(Inatsisartunut ilaasorta, Anders Olsen, Siumut)

Tungavilersuut:

Nunatta sinersortaatqarnikkut kiffartuunneqarnerata suli annertusineqarnissaanik sulineq pimoorullugu sulissutigisariaqaripput isumaqarpunga.

Nanortallip sinersortaatitigut tikinneqartarnissaa aatsaat taamak pingaaruteqartigilerpoq. Pinngortitarsuup nukingi, imarluk, avinngarusimasumiinneq tikikkuminaassinnaanerlu tungaviupput Nanortallip sinersortaatqarnikkut tikinneqartariaqarneranut oqariartornermi.

Imarluttartorsuummat umiarsuarmik isumannaatsumik tikinneqartarnissaq pingaarluinnarpoq, taamaammat taqqavani innuttaasut angalaniarnikkut toqqissisimasumik atugaqalernissaat anguniarlugu sukataarutigalugu piviusunnngortitsiniarluni sulineq ingerlaqqittariaqarpoq.

Nunatta kujaterpiaani innuttaasut atsiornernik katersititsinerat qanittumi naammassineqarpoq, innuttaasullu 630-init ikinnerunngitsut atsiornermikkut takutippaat sinersortaatqarnikkut atukkatigut qanoq kissaateqartiginerat.

Akilersinnaassutsimik apeqqusersuisoqassappat pingaaruteqarpoq erseqqissaatigissallugu nunatsinni innuttaasut kisiisa isumalluutigalugit imartatigut angallassinermik ineriartortitsissannnginnatta, tassami takornariaqarfissuannngornissamik siunertaqarpugut, takornarissanullu nunarput kusanartorsuaq nittarsaatissagutsigu imaatigut sinersornikkut periarfissanik annertusaasariaqarpugut.